

UM 25 JUN 2013

Penahanan Suu Kyi: ASEAN serba salah

PUTRAJAYA 24 Jun — Penahanan semula pemimpin prodemokrasi Myanmar, Aung San Suu Kyi oleh junta tentera negara itu meletakkan ASEAN dalam keadaan serba salah, kata Datuk Seri Dr. Mahathir Mohamad hari ini.

Perdana Menteri berharap kerajaan Myanmar mengambil kira pandangan negara-negara lain berhubung perkara itu terutama yang disuarakan oleh negara-negara dalam ASEAN.

Sambil menyatakan beliau tidak mengetahui kenapa Suu Kyi masih tidak dibebaskan, Dr. Mahathir berharap kerajaan Myanmar akan membebaskan pemimpin Liga Demokrasi Nasional tersebut secepat mungkin.

“Penahanan itu menjadikan ASEAN berada dalam serba salah,” katanya pada sidang akhbar bagi mengumumkan penyusunan semula Kabinet di pejabatnya di sini.

Perdana Menteri diminta mengulas tindakan Yangon yang masih menahan Suu Kyi sejak 30 Mei lepas berikutan pertempuran antara para penyokongnya dan kumpulan prokerajaan di utara negara tersebut.

ASEAN dianggotai oleh Malaysia, Thailand, Indonesia, Filipina, Singapura, Brunei, Kemboja, Laos, Vietnam dan Myanmar.

Kemasukan Myanmar ke dalam ASEAN pada Julai 1997 adalah atas daya usaha dan sokongan kuat daripada Malaysia.

Pada 19 Jun lepas, Menteri Luar Myanmar, Win Aung dilaporkan berkata, pihaknya masih tidak dapat memberikan tempoh bilakah Suu Kyi dapat dibebaskan.

Sambil menyatakan kerajaan Myanmar menghargai pandangan ASEAN berhubung isu itu, Win Aung berkata, kerajaannya tidak akan membatalkan proses damai yang diusahakan bagi membuka jalan kepada perbincangan mengenai demokrasi di negara tersebut.

Bekas diplomat Malaysia, Tan Sri Razali Ismail dilantik oleh Pertubuhan Bangsa-Bangsa Bersatu sebagai wakil bagi mengadakan rundingan ke arah merealisasikan demokrasi di Myanmar.